

APERTURA DI HAVANA BEACH CLUB CU CHICHI PERALTA TABATA "OUT OF THIS WORLD"..

Fotos/texto: Jan Poets.

DEN AMBIENTE

** Diasabra anochi ultimo Aruba a sera conoci cu su sitio nocturno nobo, HAVANA BEACH CLUB, na unda pa e ocasion di apertura aki tabatin presentacion di Chichi Peralta y Son Familia for di Republica Dominicana y Quasi di Aruba. Un publico limita a experencia un anochi hamas visto aki na Aruba. For di e prome stap den Havana Beach Club, un i tur a keda sumamente impresiona di e bunita lugar pintoresco aki, cu realmente ta duna un ambiente distinto y agradable. Cu presentacion di Chichi Peralta y su estreyanan di Son Familia den cual nos orguyo musico internacional Hildward Croes ta forma parti, a dorna e anochi aki den un toke di elegancia hamas visto aki na Aruba. For di momento cu Chichi Peralta cuminsa resona su prome numero "La Ciguapa", e publico a cay den un trans formal di alegria. Chichi Peralta durante dos hora y mei a deleita e publico cu un joya di concierto, presentando tur su exitoso hitnan manera "La Ciguapa, Amor Narcotico, Sol de Verano, Enamorao, Ella Tiene y mucho mas. Durante e tremendo espectaculo aki, Chichi Peralta a sa di entretene e publico constantemente y a duna un señor show riba su diferente instrumentonan, demostrando su talento extraordinario como percusionista. Chichi Peralta y su estreya musiconan a demostra di ta un orquesta di halto nivel y caliber y cu actualmente nan ta e mihor orquesta latino den e estio aki. Tambe Chichi Peralta a demostra cu e tin su propio estilo cu a cay na agrado di un i tur. Durante e anochi maraviyoso aki, Hildward Croes a ricibi un reconocimiento den forma di un plakaat. Tambe Robert Jeand'or kende ta un gran amigo di Chichi Peralta a comparti un momento riba escenario improvisando un cancion hunto cu Chichi Peralta. Despues di e fabuloso espectaculo di Chichi Peralta, a toca turno pa Quasi clausura e anochi formidable aki, cual nan a sa di realiza esaki den un forma excelente. Realmente tabata un anochi cu tur esnan cu tabata presente a keda cu gana pa un repeticion y esnan cu no tabata presente a perde un anochi "OUT OF THIS WORLD"...



**** Di e forma aki Chichi Peralta tabata entretene e publico..**




**** Robert Jeand'or improvisando un tema hunto cu Chichi Peralta, mientras por mira Hildward Croes tras di su teclado.**



**** Grêgo, C-Zar y Nando di Quasi den nan outfit perfecto pa e anochi aki..**



**** Chichi Peralta percusionista extraordinario cu su propio estilo a demostra clase, nivel y caliber..**



**** Aruba su orguyo musico internacional Hildward Croes cu su acordeon durante e cancion "Enamorao"...**



**** Hildward Croes ricibiendo su plakaat di reconocimiento for di Myrlene Marquez den presencia di Chichi Peralta..**